

Morning Regional Dogri News

26 October, 2025

09.20 Hrs

Headlines

1. प्रधानमंत्री नरेंद्र मोदी होर अज्ज बडुलै 11 बजे रेडियो कार्यक्रम 'मन की बात' राएं अपने विचार लोकें कन्नै सांझे करडन।
2. मुख्मन्त्री उमर अब्दुल्ला हुं'दा उच्च शिक्षा च म्यार ते नवाचार दा आह्वान। राश्ट्री शिक्षा नीति कनक्लेव-2025 दे समापन समारोह गी संबोधित कीता।
3. खेड्डु मंत्री सतीश शर्मा होरें बी.सी.सी.आई अध्यक्ष हुं'दे नै बैठक लाइयै जम्मू-कश्मीर च क्रिकेट ढांचे दे विकास बारै चर्चा कीती।
4. समूलचा जम्मू-कश्मीर 1947 च अज्जै दे रोज होए दे एहदे भारत नै विलय दे चेत्ते च विलय दिवस मना करदा ऐ।
5. पुंछ जिले दे मनकोट ब्लॉक नै नीति आयोग आसेआ आयोजित Regional Best Practices Seminar च विशेष पंछान हासिल कीती ऐ।

<><><><><><>

PM-MKB

प्रधानमंत्री नरेन्द्र मोदी अज्ज दिनै 11 बजे आकाशवाणी पर मन की बात कार्यक्रम दे राहें देश-बदेश दे लोकें कननै अपने बचार सांझे करडन। एहू इस माहवार रेडियो कार्यक्रम दी 127मीं किशत होग। एहू कार्यक्रम आकाशवाणी ते दूरदर्शन दे समूलचे नेटवर्क, आकाशवाणी समाचार वेबसाइट ते न्यूज़ऑनएयर मोबाइल ऐप पर प्रसारत कीता जाह्ग। एह्दा सिद्धा प्रसारण आकाशवाणी समाचार, डीडी न्यूज़, प्रधानमंत्री हुं'दे दफ्तर ते सूचना ते प्रसारण मंत्रालय दे यूट्यूब चैनलें पर बी कीता जाह्ग। आकाशवाणी जम्मू आसेआ हिंदी प्रसारण दे तुरत मगरा एह्दा डोगरी भाशा च अनुवाद बी प्रसारत कीता जाह्ग। डोगरी भाशा च एह्दे अनुवाद दा प्रसारण रातीं 8 बजे इक बारी परतियै बी होग। तोआई आकाशवाणी जम्मू दे क्षेत्रीय समाचार एकांश आसेआ मन की बात पर इक रातीं साड्डे 10 बजे इक बशेश परिचर्चा प्रसारत कीती

जाहग जेहदे च साढे परौहने होडन मन्ने-परमन्ने दे समाजी कार्यकर्ता ते साईकॉलोजिस्ट डाक्टर रोमेश शर्मा। इंदे कन्नै गल्लबात करडन साढे न्यूज़ एंकर विजय बजाज।

<><><><><><>

LG-Sports Person

उपराज्यपाल मनोज सिन्हा होरें राजभवन च निजी स्कूल दे बेहतरनीन खडारिएं कन्नै गल्लबात कीती। इस गैंऽ दा मकसद युवा हुनर गी प्रोत्साहन देना हा। उनें बक्ख-बक्ख राश्ट्री ते अंतरराश्ट्री आयोजनं च बेहतरनीन प्रदर्शन करने लेई विद्यार्थिएं दी सराहना कीती ते उनेंगी आखेआ जे ओहू अपने आपा गी होर बी बेहतर बनाने लेई कम्म करन। एल.जी होरें विद्यार्थिएं गी औने आहले कार्यक्रम ते भविकख लेई शुभकामनां दित्तियां। इस मौके विद्यार्थिएं कन्नै स्कूल दा अमला बी मौजूद हा जिनें उपराज्यपाल होरेंगी स्कूल दी खेडूं सरबंधी गतिविधिएं बारै जानकारी दिती।

<><><><><><>

CM-Education

मुख्यमंत्री उमर अब्दुल्ला होरें आखेआ ऐ जे जम्मू-कश्मीर दे शिक्षा सरिस्ते गी बदलदे समें कन्नै होर बेहतर होना लोडचदा। खित्ते च उच्च शिक्षा आहले क्षेत्र च म्यार ते नमिएं काहडें गी उनें प्रमुख थम्म दे तौर पर कायम करने पर जोर पाया। श्रीनगर च अमर सिंह कालेज च राश्ट्री शिक्षा नीति सरबंधी कन्क्लेव-2025 दे समापन सत्र गी संबोधित करदे होई मुख्यमंत्री होरें आखेआ जे पढाई दरान मुख ध्यान सिक्खने आहलें पर दित्ता जाना लोडचदा। उनें आखेआ जे .. विद्यार्थिएं गी बक्ख-बक्ख विशे चुनने, रोजगार दे मौकेउपलब्ध करोआने, आत्मविश्वास जगाने ते अभ्यास आहली सिखलाई दा मौका दिंदी ऐ। उनें जोर देइयै आखेआ जे शिक्षा दा मुख मकसद विद्यार्थिएं गी असल दुनिया दी चुनौतिएं लेई तैयार करना ऐ। सिक्खने ते कम्मकाज आहली थाहें बशकार दी बित्थ गी पूरने पर होना लोडचदा।

<><><><><><>

Satish-BCCI

युवा सेवाएं ते खेड्डें सरबन्धी मैहकमे दे मंत्री सतीश शर्मा ते भारती क्रिकेट कंट्रोल बोर्ड दे अध्यक्ष मिथुन मन्हास हुं'दे बशकार होई दी इक बैठका च जम्मू-कश्मीर च क्रिकेट गी बढ़ावा देने सरबन्धी ढांचे ते सुविधाएं च बाह्य विस्तार करने गी लेइयै तफसीली सोच-विचार होआ। मंत्री होरें बी.सी.सी.आई अध्यक्ष होरें'गी आखेआ जे सरकार जम्मू-कश्मीर च खेड्डू प्रतिभाएं गी प्रोत्साहन देने ते जमीनी सतह तगर क्रिकेट ढांचे गी मजबूती देने गितै पूरी चाल्ली बचनबद्ध ऐ। उनें जम्मू-कश्मीर च सिखलाई सुविधाएं गी अज्जै-कल्लै दे ढंगै दा बनाने, नौजोआनें गी खेड्डें कन्नै जोड़ने लेई कार्यक्रमें दे आयोजन ते बाकायदगी कन्नै क्रिकेट टूर्नामेंट कराने दी जरूरतै पर जोर दित्ता, टकोहदा करियै ग्रामीण ते दूर-दरेडे इलाकें च बी। मिथुन मन्हास होरें सरकार दी इस सोच ते बचनबद्धता दी सिफ्त करदे होई बोर्ड दी तरफा केंद्र शासितप्रदेश च क्रिकेट गी हर स्तरै पर बढ़ावा देने च हर चाल्ली दे सहयोग दा यकनी दोआया।

<><><><><><>

Route-Marches Nagrota

जिला पुलस जम्मू आसेआ नगरोंटा विधानसभा दे उप-चुनां दे महेनजर ग्रामीण जोन च मार्च ते कर्मिणं दी तैनाती आहली कार्रवाई सम्पन्न कीती। एहू कार्रवाई झज्जर कोटली ते नगरोंटा इलाके च होई। एहदा मकसद कारवाइणं सरबन्धी तैयारिणं, बलें बशकार तालमेल ते चुनां गी रमानदारी आहले ढंगै सिर करोआना ऐ। एहदा मकसद लोकें च विश्वास बहाली ते चुनां प्रक्रिया दरान कनून बवस्था बनाई रक्खना बी ऐ हा। हल्के च चुनां रमानदारी आहले ढंगै सिर करोआने लेई पुलस अधिकारिणं बलें गी सौहगा सतर्क रौहने, आपूं'चै तालमेल बनाइयै कम्म करने ते सरबन्धी नियम-कायदे दी पालना करने पर जोर पाया।

<><><><><><>

Accession Day

अज्ज विलय दिवस मनाया जा'रदा ऐ। 1947 च अज्जै दे दिन उस्सलै दी रियासत जम्मू-कश्मीर दे महाराजा हरि सिंह होरें औपचारिक तौर पर जम्मू-कश्मीर गी भारत गणराज्य च शामिल होने सरबन्धी दस्तावेजें पर दस्तखत कीते हे। एहू फैसला बड़े गै मुश्कल समें च लैता गेआ हा,

जिसलै आजादी मगरा इत्थे हिंसा ते गड़बड़ी आह्ला माहौल बने दा हा। एहू दिन हर ब'रे इस ऐतिहासिक क्षण ते मुख्य दी एकता ते अखंडता प्रति बचनबद्धता लेई मनाया जंदा ऐ।

<><><><><><>

Prog. Announcement

आकाशवाणी जम्मू दे प्रादेशिक समाचार एकांश आसेआ अज्ज विलय दिवस दे मौके पर 25एं मिनटें दे इक्क विशेष कार्यक्रम दा प्रसारण कीता जा'रदा ऐ। जम्मू-कश्मीर दे भारत कन्नै विलय दे 78 ब'रे पूरे होने दे सरबंघै च एहू कार्यक्रम दपैह्नी 12 बजे प्रसारित कीता जाग। इस विशेष कार्यक्रम च स्टाफे प्ररौहने होडन जम्मू यूनिवर्सिटी दे स्ट्रैटजिक ते रिजनल स्टडीज़ विभाग च असिस्टेंट प्रोफेसर डॉ. गणेश मल्होत्रा, जेह्ड़े इस विशे पर अपने माहिराना विचार सांझे करडन।

<><><><><><>

Mankote-Special Recognition

पुंछ जिले दे आकांक्षी ब्लॉक मनकोट नै नीति आयोग आसेआ वाराणसी च आयोजित उत्तर भारत दे रीजनल बेस्ट प्रैक्टिसिज़, सेमीनार च विशेष पंछान दर्ज कराई ऐ। जिले दी नुमायंदगी करदे होई उत्थूं दे अतिरिक्त जिला विकास कमिशनर पंकज मंगोत्रा ते बी.डी.ओ एजाज अहमद होरें खुराक दे स्हेई इस्तेमाल बारै इक केस दी पेशकारी कीती जेह्दा विशे हा "खुराक ते समुदाय दी तंदरूस्ती लेई इक जन आंदोलन"। जिला विकास कमिशनर अशोक कुमार शर्मा हुं'दे मार्गदर्शन तैहत इस पैहल नै दूर-दरेडे ते बन्ने कन्नै लगदे इस ब्लॉक च खुराक ते सेहत च बड़े पैमाने पर बेहतरी आहनने च कामयाबी हासल कीती ऐ।

<><><><><><>

Reasi Awas Mela

म्युनिसिपल काउंसल रियासी नै जारी अंगीकार-2025 जागरूकता अभियान दे इक हिस्से दे तौर पर बस स्टैंड पर प्रधानमंत्री आवास मेले (शैली) दा आयोजन कीता। इस कार्यक्रम दा आयोजन बसनीकें गी प्रधानमंत्री आवास योजना (शैली) दे बारे च जानकारी देने लेई कीता गेआ हा। मेले च योजना दे फायदें, पात्रता मानदंडे ते 'सभनें लेई आवास' योजना दे तैहत आवास लेई आवेदन प्रक्रिया पर लोऽ पाई गई। म्युनिसिपल काउंसल रियासी दे मुख् कार्यकारी अधिकारी मोहम्मद एजाज तांत्रे होरें मौके पर गै लोकें गी मार्गदर्शन देने ते उंदे सोआलें दा परता देने आस्तै गल्लबात कीती। आवेदन प्रक्रिया गी सखल्ला बनाने आस्तै स्टाल, ब्रोशर ते सूचनात्मक सामग्री दस्तयाब करोआई गई। इस अभियान च सभनें प्रतिभागिएं आस्तै टिकाऊ शैली जीवन, साफ-सफाई ते पर्यावरण दे मताबक आवास प्रचलन गी बी बढ़झवा दित्ता गेआ।

<><><><><><>